

आकाशवाणी

खास-खास खबरां:-

- प्रधानमंत्री नरेन्द्र मोदी होर अज्जै सोआं सेशेलस दी यात्रा पर जा रदे न। ओह सेशेलस दे राश्ट्रीय दिवस दे स्वर्ण जयंति समारोहें च बतौर परौहने शिरकत करडन।
- केन्द्रीय गृह ते सहकारिता मंत्री अमित शाह अज्ज गुजरात दे गांधीनगर स्थित महात्मा मंदर सोआ भारत दी पैहली सहकारिता आधारित टैक्सी सेवाभारत टैक्सी दी शुरुआत करडन।-
- उद्योग ते बपार मंत्री पीयूष गोयल होरें आखेआ जे भारत ते बरतानिया व्यापक आर्थिक ते बपार समझौते कन्नै दोनै देशे दे सरबन्ध लगातार मजबूत होआ रदे न।
- भारत नै तमिलनाडू दे कल्पक्कम स्थित इंदिरा गांधी परमाणु अनुसंधान केन्द्र च दुनिया दे पैहले हाइड्रोजन उत्पादन केन्द्र दा उदघाटन कीता ऐ।
- वेनेजुएला च आए दे जबरदस्त भूचाल च मरोने आहलें दी गिनतरी धोड़ी पुज। 920जी गेई ऐ।
- भारत नै प्रभावतें दी सहायता लेई आपरेशन अमिस्ताद शुरु कीता ऐ जेहदा मकसद वेनेजुएला दे लोकें कन्नै इक जुटता जाहर करदे होई मनुक्खी सहायता ते आपदा राहत पुजाना ऐ।
- 5. FIF मर्दे दी प्रो लीग हॉकी च कल राती भारत नै पाकिस्तान गी 7-1 कन्नै रहाई दिता।
- 6. फीफा विश्व कप 2026 दे ग्रुप आई दे इक मैच च फ्रांस नै नार्वे गी 4-1 कन्नै ते सेनेगल ने इराक गी 5-0 कन्नै रहाया।

<><><><><><>

PM -Seychelles Visit

प्रधानमंत्री नरेन्द्र मोदी होर अज्जै सोआं सेशेलस दी यात्रा पर जा रदे न। ओह सेशेलस दे राश्ट्रीय दिवस दे स्वर्ण जयंति समारोहें च बतौर परौहने शिरकत करडन। प्रधानमंत्री मोदी होर एहदे शा पैहले बरे 2015 च सेशेलस यात्रा पर गे हे। विदेश मंत्रालय नै जानकारी दिती ऐ जे स्वर्ण जयंति समारोहें च दंड नौसैनिक जहाजें सनै भारतीय रक्षा बल दी टुकड़ी बी हिस्सा लैग।

यात्रा दौरान मोदी होर सेशेलस दे राष्ट्रपति डाक्टर पैट्रिक हर्मिनी हुंदे कन्नै गल्लबात करडन ते दौनें देशें दे दपक्खियां सरबंधें दी समीक्षा करडन।

<><><><><><>

HM- Bharat Taxi

केन्द्रीय गृह ते सहकारिता मंत्री अमित शाह अज्ज गुजरात दे गांधीनगर स्थित महात्मा मंदर सोआ भारत दी पैहली सहकारिता आधारित टैक्सी सेवा-भारत टैक्सी दी शुरुआत करडन। कार्यक्रम च सहकारिता क्षेत्र कन्नै जुड़े वरिष्ठ पदाधिकारी बक्ख-बक्ख संस्थाएं दे प्रतिनिधि ते भारत टैक्सी कन्नै जुड़े दे 4 जहार शा मते सारथी शामिल होडन। भारत-टैक्सी सहकारिता दे सिद्धांते पर आधारित डिजिटल मोबिलिटी मंच ऐ ते “सारथी ही मालिक” दे नजरिए गी साकार करदा ऐ। इस मॉडल दे तैहत टैक्सी चालक छड़िया सेवां प्रदान नैई करडन, सगुआं भागीदार ते मालिक बी होगन। एहदे कन्नै चालकें दा आर्थिक सशक्तिकरण होग ते उनें गी समाजी सुरक्षा हासल होग।

<><><><><><>

Goyal- India UK Ties

उद्योग ते बपार मंत्री पीयूष गोयल होरें आखेआ जे भारत ते बरतानिया व्यापक आर्थिक ते बपार समझौते कन्नै दौनें देशे दे सरबंध लगातार मजबूत होआरदे न। लंदन च व्यवसायिक पूर्ण सत्र गी सम्बोधित करदे होई गोयल होरें आखेआ जे बक्ख-बक्ख क्षेत्रें दे प्रमुखें कन्नै गल्लबात सार्थक रेही। उनें व्यापक आर्थिक ते बपार समझौते राहें नमें मौके पैदा होने कन्नै दौनें देसे दे बपारिएं गी सहयोग बधाने, नवाचार गी बढ़ावा देने ते सांझी समृद्धि लेई निवेश करने आस्तै साद्दा दिता ऐ।

<><><><><><>

Hydrogen Facility –Nuclear

परमाणु ऊर्जा विभाग दे सचिव अजीत कुमार मोहंती होरें तमिलनाडू दे कल्पक्कम स्थित इंदिरा गांधी परमाणु अनुसंधान केन्द्र च दुनिया दे पैहले हाइड्रोजन उत्पादन केन्द्र दा उदघाटन कीता ऐ।

एह सयंत्र फास्टब्रीडर टेस्ट रिएक्टर सवां हासल परमाणु तपश कन्नै कॉपर क्लोरीन रसैनिक प्रक्रिया कन्नै कम्म करदा ऐ। डाक्टर मोहती होरें आखेआ कि हाइड्रोजन जनेई उभरदी स्वच्छ ऊर्जा टेक्नोलजी कन्नै परमाणु ऊर्जा दा एकीकृत सतत ऊर्जा भविष्य दी दिशा च इक महत्वपूर्ण गैह ऐ। सचिव होरें इस मौके आखेआ कि परमाणु ऊर्जा कार्बन मुक्त ते भरोसमंद बिजली उपलब्ध कराने दी छमता रखदी ऐ।

<><><><><><>

O.P Amistad

भारत नै वेनेजुएला च आए दे जबरदस्त भूचाल दे बाद प्रभावतें दी सहायता लेई आप्रेशन अमिस्ताद शुरु कीता ऐ जेहदा मकसद वेनेजुएला दे लोकें कन्नै इक जुटता जाहर करदे होई मनुक्खी सहायता ते आपदा राहत मिशन ऐ। विदेश मंत्रालय नै दस्सेआ ऐ आप्रेशन अमिस्ताद तैहत कल भारती वायुसेना दे दंड जहाजें राए राहत सामग्री ते 41 सदस्यी इक बचाव दल भेजेआ गेआ ऐ। राहत समग्री च डाक्टर, नीम डाक्टरी अमला, भारती फौज दी फिल्ड अस्पताल उपकरण, दोआइयां ते होर जरूरी समेयान शामिल ऐ। बचाव दल च शामिल 41 मिम्बरे च माहिर डाक्टरें दे इलावा तजुर्बेकार बचा कर्मी बी शामिल न। विदेश मंत्रालय नै आखेआ ऐ कि भारत विपदा दी इस घड़ी च वेनेजुएला सरकार ते लोकें कन्नै इक जुटता कन्नै खड़ोती दी ऐ।

<><><><><><>

Venezuela Earthquake Toll

वेनेजुएला च आए दे जबरदस्त भूचाल च मरोने आहलें दी गिनतरी 920 धोड़ी पुज्जी गई ऐ। इस परकोपी कारण घाऽल होए दे दी गिनतरी कोई 3 जहार दे कोलकाल दस्सी जा'रदी ऐ। मलबे हेठ दबोए दे लोकें गी बाहर कड़ने दा कम्म युद्ध स्तरें पर चलै करदा ऐ। कराकास ते समुन्द्र कन्नै लग्गदे ला-गुआइरा च मलबे हेठ दबोए दे लोकें दे चीखने- करलाने ते मदद लेई अवाजां सुनोचा करदियां न ते बचाव कर्मी दिन-रात मशक्कत करै करदे न तां जे फसे दे लोकें गी जींदा बचाया जाई सकै।

जियां जे पैहले बी खबर दिती जाई चुकी दी ऐ कि अतरु उत्थे 7 इशारिया 2 ते 7 इशारिया 5 तीव्रता दे भूंचाल कारण जबरदस्त तबाही होई दी ऐ। राष्ट्रपति डेल्सी रोड्रिग्स होरें उत्थे इमरजेंसी घोषत करी दिती दी ऐ। भारत सनैं केंई मुल्खें विपदा च फसे दे लोकें गी मदाद भेजी ऐ।

<><><><><><>

FIH Hockey

FIH मर्दे दी प्रो-लीग हॉकी च कल राती भारत नै पाकिस्तान गी 7-1 कन्नै रहाई दिता। लंदन दे ली बैली हॉकी सेंटर च खेड्डे गेदे मैच दे पैहले क्वार्टर च अबू बकर ने पेनलटी कार्नर गी गोल च बदलियै पाकिस्तान गी बढ़त दोआई। दूए क्वार्टर च सुखजीत सिंह ते हरमनप्रीत सिंह होरें शानदार गोल करियै मैच दा रौं गै बदली दिता । एहदे बाद त्रीए क्वार्टर च हार्दिक सिंह, जुगराज सिंह, अभिषेक ते राजकुमार पाल ने 4 गोल कीते। 7मां गोल चौथे क्वार्टर च दिलप्रीत ने कीता। कल भारत दा मकाबला इंग्लैंड कन्नै होग।

<><><><><><>

FIFA World Cup

फीफा विश्व कप 2026 दे ग्रुप आई दे इक मैच च फ्रांस नै नार्वे गी 4-1 कन्नै ते सेनेगल ने इराक गी 5-0 कन्नै रहाया। फ्रांस इस जित दे कन्नै ग्रुप-आई च पैहले नम्बर पर आई गया ऐ। नार्वे 6 अंके कन्नै 32में राउंड च पुज्जी गेदा ऐ जिसले कि सेनेगल इस खीरी राउंड च पुज्जने दी द्रौड़ च बने दा ऐ।

<><><><><><>

US-Iran Attack

अमरीका ने होर्मुज जल डमरु मध्य च माल ढोआई आहले जहाज पर हमले दे परते च कल इरान पर हमले कीते न। अमरीकी केन्द्री कमान ने जानकारी दिती ऐ कि ईरान पर मिसाइल ते ड्रोन कन्नै हमले कीते गे ते ओहदे रडार प्रतिष्ठानें गी बी नशाना बनाया गया।

एहदे शा पैहले राश्ट्रपति डोनाल्ड ट्रम्प होरें व्हाई हाउस च संवाददाताएं कन्नै गल्लबात च आखेआ हा कि संघर्ष विराम समझौते दी खलाफवर्जी पर एहदे गंभीर नतीजें दा पता लग्गोग।

<><><><><><>

PM-Mann ki Baat

प्रधानमंत्री नरेंद्र मोदी कल बड्डलै आकाशवाणी दे मन की बात कार्यक्रम च देस विदेश दे लोकें कन्नै अपने बचार सांझे करडन। एह माहवार रेडियो कार्यक्रम दी 135मीं कड़ी होग। एहदा प्रसारण आकाशवाणी ते दूरदर्शन दे सब्बनैं चैनलें, ए.आई.आर न्यूजी दी वेबसाइट ते न्यूज आन एआईआर मोबाइल ऐप पर कीता जाहग। कन्नै गै ए.आई.आर न्यूज, डी.डी न्यूज, प्रधानमंत्री कार्यालय ते सूचना प्रसारण मंत्रालय दे यू.ट्यूब चैनलें पर बी एहदा सिद्धा प्रसारण कीता जाहग। हिंदी प्रसारण दे तुरत मगरा क्षेत्रीय भाशाएं च बी कार्यक्रम दा प्रसारण कीता जाहग।

<><><><><><>

Project Hawk Eye

औंदी 3 जुलाई थमां शुरु होआ रदी श्री अमरनाथ जी दी यात्रा लेई तैयारियें गी होर मजबूत करदे होई जम्मू-कश्मीर पुलसै- यात्रा आले रस्ते पर लगातार निगरानी आस्तै इक तकनीक आधारित पैहलकदमी Project Hawk Eye शुरु कीती ऐ। आकाशवाणी दे जम्मू संवाददाता नै जानकारी दिती ऐ जे अनंतनाग पुलस नै अमरनाथ यात्रा लेई सुरक्षा तंत्र गी मजबूत करने गितै इस पैहलकदमी दी शुरुआत कीती ऐ। Project Hawk Eye दे तैहत अनंतनाग पुलस आसेया यात्रा आले रस्ते पर ब्हाई रस्तेआ निगरानी लेई 5 ड्रोन यूनिटें गी तैनात कीता गेआ ऐ। एहदे इलावा पुलस नै महत्वपूर्ण थाहरें पर 416 High Resolution CCTV कैमरे ते चेहरें दी पंछान करने आली प्रणाली दा बुनियादी ढांचा बी कायम कीता ऐ तां जे कन्नो-कन्नी निगरानी यकीनी बनी सकै।

<><><><><><>